

retire toy d'aupres de moy ; si mon Pere qui m'a instruit, dit que ie viue seul, ie luy obeïray, s'il me fait remarier à vne Chrestienne, ie la prendray. Comme on luy auoit donné vn catalogue des iours de festes, & qu'il [60] les gardoit dans les bois, sa femme luy reprochoit qu'il estoit paresseux, qu'il ne chaffoit point, qu'il ne feroit qu'un gueux, qu'il n'auroit pas dequoy viure, ny dequoy se couvrir. Tes paroles, luy disoit-il, ne m'estonnent pas, quand tout ce que tu dis deuroit arriuer ie ne laisserois pas d'obeïr à Dieu, ie n'attens pas de luy des richesses en terre, i'espere neantmoins qu'il m'assistera, & quoy que l'on me die, ie luy obeïray : Quelques Sauvages voyans qu'il jettoit aux chiens les os de castor qu'il prenoit, l'accusoient de folie, disant qu'il n'en prendroit plus : C'est l'une de leurs superstitions anciennes de jeter dans la riuere ou dans le feu les os de certains animaux, afin qu'ils ayent bonne chasse. Luy leur reprochoit leur ignorance : Ces animaux sont faits pour nous, disoit-il, c'est vne tröperie du Diable de s'arrester à ces superstitions, vous vous arrestés à des menfonges, & vous fermés les yeux à la verité.

Si on l'incitoit à embrasser quelque chose où il doutast qu'il y eût peché ; ie ne sçay pas, faisoit-il, si cela m'est permis, ie le demanderay à mon Pere, & ie feray ce qu'il me dira sur ce sujet.

[61] Quand il s'en alla faire sa chasse pendant l'hyuer, nous luy donnâmes, comme i'ay remarqué cy-dessus, vn petit calendrier, où il marquoit tous les iours ; nous l'exhortâmes aussi de se trouuer le iour du grand Vendredy à Kebec, s'il y auoit moyen, il n'y manqua pas, il s'y trouua parmy les François, & fut plus de trois heures à l'Eglise, assistant au